

太平寰宇記

第三十四冊

太平軍字記

第五十四卷

太平寰宇記卷之一百四十一

山南西道九

金州

商州

金州

金州

安康郡今理西城縣

禹貢梁州之域昔虞舜常居之謂之

嬀墟帝王世紀謂之姚墟卽此也歷夏殷州名不改周禮職方氏省梁并雍州又爲雍州之域于周爲庸國之地戰國爲楚附庸地後爲楚所滅復爲楚地秦惠文王攻楚取漢中地置漢中郡今州卽漢中郡之西城縣也以地臨漢水境枕秦州故爲

秦楚之地焉三國志云建安二十年分漢中之安  
陽西城爲西城郡後地入蜀蜀以申儀爲西城太  
守後申儀降魏魏文帝使復守之因改爲魏興郡  
移理洵口晉太康二年移理錫縣今豐利界東魏  
興故城是也三年又改理平陽縣今廢黃土縣東  
平陽故城是也至元康中又移理錫縣今均州鄖  
鄉縣也其封何曾爲西城侯亦此地也永嘉後復  
移理西城故城宋末分魏興之永康縣置安康郡  
齊不改梁于魏興郡置北梁州尋改爲南梁州按  
後魏正始元年北梁州長史夏侯道遷舉漢中歸

魏魏以漢中遺民在東垂者居此由是改爲魏興  
郡又按梁州記後魏合華陽金城二郡爲忠誠郡  
領亭香錫城金川三縣卽此地孝昌三年于安康  
郡置東梁州西魏大統元年梁將蘭欽東伐取南  
鄭其魏興等諸郡還梁梁罷梁州廢帝元年大將  
軍達奚武吞併山南東梁州刺史李遷哲降魏魏  
又于魏興置東梁州三年因其地出金改爲金州  
仍領魏興郡後周天和四年省西城縣仍移吉安  
縣理西城廢縣廨隋開皇三年罷郡所領縣並屬  
金州大業二年改吉安爲金川縣三年罷州爲西

城郡唐武德元年復爲金州領西城金川洵陽石泉安康五縣其年割洵陽置洵州又分置洵城驢川二縣洵州凡領三縣又置平利縣屬金州分安康置西安州又立寧都廣德二縣隸西安州二年改安州爲直州三年金州置總管府管金并直洵洋南豐均圻遷房重順十二州七年廢洵州以洵城洵陽驢川三縣來屬貞觀元年廢直州又省寧都廣德以安康來屬仍省驢川縣八年省洵城縣又以廢上州之廢黃土縣來屬天寶元年改爲安康郡至德二年改爲漢南郡乾元元年復爲金州

晉天福四年升爲懷德軍節度使九年降爲防禦  
州至皇朝乾德四年改爲昭化軍節度使

元領縣六

今五

西城

平利

洵陽

漢陰

石泉

一縣廢

洵陽

入洵陽

州境

東西四百里

南北二千里

四至八到

東北至東京一千九百里

太平寰宇記 卷之百四十一  
北至西京取庫谷路一千五百四十里取藍田路  
一千八百六十里

北至長安取庫谷路六百八十里取藍田路一千  
里

東至均州七百二十里

南至夔州五百一十四里

西至洋州五百里

北至京兆府界五百六十六里

東至房州五百四十八里

西南至通州一千一百里

西北至京兆府長安縣界五百九十里

東北至商州六百六十里

戶

唐開元戶九千六百七十

皇朝戶主三千六百一十七客八千四百一十五

風俗

漢高祖發巴蜀伐三秦遷巴中渠帥七姓居商洛  
其俗至今猶多獵山伐木深有楚風

人物

無

土產

麝香 黃蘗 紙 漆 蠟 鍾乳 麝金 厚

朴

西城縣

舊十七鄉  
今七鄉

本漢舊縣屬漢中郡應劭注漢書

云媯墟爲西城舜居于此潁容釋例云舜居西城  
本曰媯汭卽此西魏立郡于此 伏羲山按十道

要錄曰拋鉸二山焚香氣必合于此山 虞舜祠

按水經云西城縣故城內有虞舜祠 吉挹城晉

吉挹爲梁州時爲苻堅所攻遂于縣南九里峻山

上築此城攻圍三年挹堅守不下是名吉挹城

西城故城按水經注云漢水經月川口又東經西

城故城南其故城卽漢之西城今州西北四里漢江之北西城山之東魏興郡故城是也當谷口路南與州城相對其西城山在州西北五里蓋後魏時移今理

平利縣

東南七十里舊三鄉今七鄉

本漢西城地兩漢及魏蓋爲

西城縣晉于今縣平利川置上廉縣取上廉水爲名尋又改爲吉陽縣按周地圖記云上廉縣後移還上庸于平利川置吉陽縣後魏改爲吉安縣後周天和四年移吉安於今州理唐武德元年再於上廉城置平利縣八年又移於古聲口戍南聲水

之東黃羊水北卽今縣也大厯六年以戶口散落併入西城縣長慶初復置藥婦山在縣東南八十五里周地圖記云有夫婦攜子入山獵其父落崖妻子將藥救之并變爲三石人名以此得今嶺上有白父老云古仙學道于此而藥白尙存

洵陽縣

東一百二十里舊十二鄉今十九鄉

本漢舊縣在洵水之陽屬

漢中郡後漢省晉太康四年復立故魏于此置郡輿地志云魏置魏興郡領洵陽等六縣于此武德元年置洵州七年廢洵州以縣來屬金州馬跡山水經注云洵陽縣北山有懸書崖高五十丈刻

石爲文字今人不能上不知所述山下有石壇上有馬跡五所因名曰馬跡山 洵水水經注云北出洵山東南流經平陽戍下與直水合又云水經縣北至縣東又南入沔 澗水在縣西二十七里一名閭谷水北注于漢其閭字亦爲驢 高帝廟梁州記云洵陽縣南山下有漢高祖廟 留亭山行人登之愛其峭拔多停留縱覽因名之 心山漢宣帝時北平陽厥爲漢中守經此山有棲遁意遂不之郡學道感瑞見金羊因易爲姓今縣界有羊氏卽厥之族也山下多殊草有風不偃無風獨

搖上有石壇 廢洧陽縣在州東三十里本漢洧  
陽縣地晉于此置洧口 戊後魏大統十七年改置  
洧陽郡又于郡西三十三里置黃土縣居漢水南  
黃土山之西爲名後周保定二年改洧陽郡爲長  
興郡三年郡廢移黃土縣于洧陽郡解爲理隋大  
業二年以黃土縣屬金州唐天寶元年改爲洧陽  
縣大厯六年以戶口散落其地併入洧陽縣 聖  
公館漢水記云黃土縣雞鳴山北十五里有聖公  
館卽後漢光武起義兵屯此 漢水在縣城南東  
流 洧水在縣西一百步自商州上津縣來東流

于漢

漢陰縣

西一百一十里舊十二鄉今六鄉

本漢安陽縣屬漢中郡有

安陽故城在今縣西二十四里卽今敖口東十里

漢江之北故城是也晉太康元年更名安康縣太

康地記及太康志臧榮緒晉書地理志並屬魏興

郡宇文周始從舊縣移于今所唐至德二年改安

康爲漢陰 梁門山在今縣東十八里卽月川水

之源也 鳳凰山周地圖記謂鳳凰山爲龍子山

疊嶂有十二層按道書云鳳凰山十二層上有仙

人藥園 直水源出永興軍乾祐縣弱嶺姜子關

經縣理西又南注于漢北流當終南山子午谷路  
是也 漢水在縣南二里東流

石泉縣

西南約三百里  
舊六鄉今五鄉

本漢西城縣地梁武帝立晉

昌郡治王水口夏侯道遷以梁州入魏移晉昌郡  
於所領長樂縣東陽邨卽今石泉縣理是也後值  
黃眾保反叛移晉昌郡于舊理因改曰魏昌周武  
成三年郡又移理東陽川仍併所領諸縣爲永樂  
一縣理于今縣南一里舊長樂縣所理處續改名  
石泉縣以縣北石泉爲名保定三年廢魏昌郡移  
石泉縣理郡城卽今縣理是也唐聖厯元年改爲

武安縣神龍初復舊爲石泉大厯六年以戶口散落併入漢陰縣永貞元年金州刺史姜公輔復奏本州先廢石泉縣以地併入漢陰縣山谷重阻一千餘里來往輸納民爲不便請于舊所復置詔從之漢水在縣東百步王水口在縣西八十里

### 商州

商州

上洛郡今理上洛縣

本商於之地禹貢梁州之域周爲豫

州之境周禮職方氏云豫州其山鎮曰華山春秋時其地屬晉所謂晉陰之地戰國時其地屬秦衛鞅封于商邑後爲內史理漢元鼎四年於此置上